

Svæðisráð Austursvæðis Vatnajökulspjóðgarðs

26. fundur

haldinn að Lyngási, 9. nóvember 2009

Mættir: Eiríkur Björn Björgvinsson, Skúli Björn Gunnarsson, Björn Ármann Ólafsson, Skarphéðinn G. Þórisson, Magnhildur Björnsdóttir og Þórhallur Þorsteinsson. Jafnframt sat fundinn Agnes Brá Birgisdóttir þjóðgarðsvörður.

Gestir fundarins: Þórunn Þorgrímsdóttir verkefnisstjóri sýningar og Elín Bergsdóttir nýráðinn aðstoðarmaður þjóðgarðsvarðar sem sat allan fundinn.

Dagskrá:

- 1a. Sýningin í gestastofunni
- 1b. Kynning á nýjum aðstoðarmanni þjóðgarðsvarðar
2. Sumarferð og ferðaskýrsla
3. Verndaráætlun/atvinnustefna og samráðsfundur í Reykjavík
4. Hólkur í Skolpu. Bréf frá Ferðafélagi Fljótsdalshéraðs til Vegamálastjóra
5. Önnur mál.

Eiríkur formaður stýrði fundi og setti hann kl. 17.10. Gengið var til dagskrár.

1a. Sýningin í gestastofunni

Samþykkt var að taka fram fyrir boðaða dagskrárliði umræðu um sýningu í gestastofunni. Þórunn Þorgrímsdóttir sýningarhönnuður hefur verið ráðinn verkefnisstjóri yfir sýningargerðinni og var hún boðin velkomin á fundinn. Hún skýrði með hvaða hætti ætlunin væri að haga sýningargerðinni. Fyrst verður unnið handrit að sýningunni og síðan verður hönnunin boðin út. Þórunn óskaði eftir að svæðisráðið segði sína skoðun á því hvaða þættir ættu að verða meginstoðir sýningarinnar.

Björn Ármann nefndi nýtingarsögu svæðsins gegnum aldirnar, jarðfræðina með Snæfell og vistfræðina. Skarphéðinn sagði Snæfell og Kverkfjöll vera tvo meginstaði svæðisins og ásamt jarðfræðinni standa upp úr. Benti líka á fjallatívvinn í Snæfelli. Tók undir með nýtingarsöguna, t.d. beitina inni í Mariutungum og víðar. Lífríkið með hreindýrin þarf líka að eiga sinn hluta í sýningunni. Heiðargæsin og heimildir um eldri hlunnindi tengd því. Sérstakt fyrir svæðið á landsvísu að samfelldur gróður er frá jökli til sjávar. Þórhallur nefndi Kverkfjöll sem virkasta eldfjallið og eldvirknina þar með heitri á, íshellu og hverum. Hraunrennsli og eldvirknin á svæðinu. Sagnir af Fjalla-Eyvindi í Hvannalindum og gróðureyðingu. Eiríkur minnti á nýlegri sögu, sögu ferðamanna inni á þessu svæði og Ferðafélagsins, hún ætti að eiga sinn part í sýningunni. Ekki mætti heldur gleyma friðunarsögunni og hvaða áhrif virkjunarframkvæmdir hafa haft. Skúli Björn tók undir það sem fram var komið og bætti við að náttúra svæðsins fléttaðist svo mikið saman við menningu og sögu dalanna að það gæfi kost á annars konar nálgun en annars staðar við jökulinn. Magnhildur minnti á að vel yrði hugsað fyrir fræðsluþættinum.

Góð umræða varð um sýninguna og það sem taka ætti fyrir á henni. Þórunn bað fólk líka um að setja niður á blað sínar hugmyndir og senda sér til viðbótar. Í lokin var aðeins rætt um nafn á stofuna og voru menn sammála að hrapa ekki að neinu í þeim efnum.

Þórunn yfirgaf fundinn að loknum þessum lið.

1b. Kynning á nýjum aðstoðarmanni þjóðgarðsvarðar

Elín Bergsdóttir var boðin velkomin til starfa og hún kynnti sig. Hún hefur starfað sem landvörður og hefur m.a. háskólapróf í landnýtingu. Elín hefur leigt Skriðu fyrir sig og fjölskyldu sína og sagðist hlakka til að takast á við starfið þó að hún þekkti kannski minna til þessa svæðis en annarra landshluta.

2. Sumarferðin

Svæðisráð fór um austursvæðið og hitti starfsfólk þjóðgarðsins dagana 5.-7. ágúst. Skúli Björn tók saman greinargerð um ferðina og liggur hún með fundargerðum svæðisráðs. Almenn ánægja var með ferðina, jafnt hjá svæðisráðfólki sem starfsfólki þjóðgarðsins.

3. Verndaráætlun/atvinnustefna og samráðsfundur í Reykjavík

Samráðsfundur verður í Reykjavík 17. nóvember nk. og verður greitt fyrir ferðir og upphald svæðisráðsmanna á fundinn. Formaður hvatti menn til að mæta og einnig að velta fyrir sér hvort einhverjir fleiri ættu að koma á fundinn.

Agnes sagði frá því að fyrirhugaður væri vinnufundur hér á austursvæði þar sem horft yrði til þess hvaða möguleikar væru í ferðaþjónustu í tengslum við Snæfellssvæðið.

Þórhallur spurði hvort ætlunin væri að skila af sér verndaráætluninni innan þeirra tímamarka sem lögin kveða á um. Eiríkur sagði að mikil umræða væri um þetta en vinnan væri í fullum gangi og þessar tímasetningar væru vissulega knappar en verndaráætlunin væri samt sem áður lifandi plagg. Ekki lægi fyrir hvort lengri frestur fengist til að ljúka áætluninni.

Agnes sagði frá því að þjóðgarðsverðirnir hefðu ákveðið að senda svæðisráðunum bréf vegna verndaráætlanna þar sem minnt væri á mikilvægi þess að taka tillit til fjárhagsins.

Umræða varð um ýmsa þætti varðandi verndaráætlunina. Skarphédinn spurði hvort sérstakt fjármagn væri til að fá sérfræðinga að ákveðnum þáttum verndaráætlunarinnar. Náttúrufræðistofnun ætli t.d. að vinna fuglaþáttinn fyrir allan þjóðgarðinn. Skarphédinn beindi því til Eiríks hvort fé væri til fyrir jarðfræðisérfræðing. Eiríkur tók að sér að að leita upplýsinga um það.

4. Hólkur í Skolpu. Bréf frá Þórhalli Þorsteinssyni til Vegamálastjóra

Með fundargögnum lá afrit af bréfi frá Ferðafélagi Fljótsdalshéraðs til Vegamálastjóra vegna hólka í ána Skolpu í Kverkfjöllum. Þórhallur lagði það fram til kynningar og umræðu. Svæðisráð fól formanni taka þetta erindi upp á næsta fundi hjá stjórn þjóðgarðsins enda um brýnt hagsmunamál að ræða.

5. Önnur mál

a) Skarphédinn spurði eftir því hvort landvarsla væri á svæðinu við Snæfell á rjúpnaveiðidögum. Agnes sagði að fjármagn hefði fengist til vörslu 9 daga af 18. Umræða varð um hvort banna ætti rjúpnaveiði innan þjóðgarðsmarka. Svæðisráð samþykkti að beina því til stjórnar að umræða yrði tekin upp um hvort reglur um fuglaveiðar og veiðar á ref og mink ættu að vera samræmdar innan þjóðgarðsins.

b) Eiríkur greindi frá því hann yrði í fæðingarleyfi frá miðjum desember og fram yfir miðjan janúar. Björn Ármann mun leysa hann af sem varaformaður á þeim tíma.

Fleira ekki rætt og fundi slitið kl. 19.25.

Skúli Björn Gunnarsson
ritaði fundargerð

Eiríkur Björn Björgvinsson

Björn Ármann Ólafsson

Þórhallur Þorsteinsson

Magnhildur Björnsdóttir

Skarphéðinn Þórisson